



ভাটারায় আ. লীগের গোপন বৈঠকের তদন্তে ডিএমপি, আগস্ট ঘিরে নেই নিরাপত্তা শঙ্কা



সংগৃহীত ছবি

রাজধানীর ভাটারায় একটি কনভেনশন সেন্টারে মিথ্যা পরিচয়ে ভাড়া নিয়ে সরকারবিরোধী গোপন বৈঠক করে আওয়ামী লীগ ও তার অঙ্গ-সংগঠনের নেতারা। পুলিশ বলছে, নাশকতার ছক ও প্রশিক্ষণের অভিযোগে এই বৈঠক নিয়ে গুরুত্বসহকারে তদন্ত চলছে। তবে আগস্ট মাস ঘিরে কোনও নিরাপত্তা হুমকি নেই বলে আশ্বস্ত করেছে ডিএমপি। একইদিনে গুলশানের একটি চাঁদাবাজি মামলায় জানে আলম অপুকে গ্রেফতার করেছে গোয়েন্দা পুলিশ।

রাজধানীর ভাটারায় একটি আবাসিক এলাকায় মিথ্যা পরিচয় ব্যবহার করে একটি কনভেনশন সেন্টার ভাড়া নিয়ে রাজনৈতিক দল আওয়ামী লীগ এবং এর অঙ্গ-সংগঠনের নেতাকর্মীরা গোপনে জড়ো হয়েছিলেন। অভিযোগ উঠেছে, তারা সেখানে সরকারবিরোধী ষড়যন্ত্র ও নাশকতার পরিকল্পনায় যুক্ত ছিলেন। এ ঘটনায় পুলিশ তদন্ত শুরু করেছে এবং ঘটনাটিকে ‘গুরুত্বের সঙ্গে’ দেখা হচ্ছে বলে জানিয়েছে ঢাকা মহানগর পুলিশ (ডিএমপি)।

১ আগস্ট, শুক্রবার বিকেলে ডিএমপির মিস্টো রোডের মিডিয়া সেন্টারে এক সংবাদ সম্মেলনে এসব তথ্য জানান ডিএমপির মিডিয়া অ্যান্ড পাবলিক রিলেশন্স বিভাগের উপ-কমিশনার মুহাম্মদ তালেবুর রহমান। তিনি বলেন, “ভাটারায় গোপন বৈঠকের পেছনে কারা জড়িত, তাদের উদ্দেশ্য কী ছিল—সবকিছুই খতিয়ে দেখা হচ্ছে।”

উল্লেখ্য, গত ৮ জুলাই ভাটারা থানার এলাকায় একটি কনভেনশন সেন্টারে ওই গোপন বৈঠক অনুষ্ঠিত হয়। এ ঘটনায় আওয়ামী লীগ ও তার সহযোগী সংগঠনের অন্তত ২২ জন নেতাকর্মীকে গ্রেফতার করেছে পুলিশ। আরও জানা গেছে, ওই বৈঠকে সেনাবাহিনীর মেজর সাদিকুল হক নামের একজন কর্মকর্তাও উপস্থিত ছিলেন বলে অভিযোগ রয়েছে। তাকে সেনা হেফাজতে নেয়া হয়েছে এবং সেনাসদর বলেছে, তার বিষয়ে তদন্ত চলছে।

পুলিশ দাবি করেছে, ওই বৈঠকে দেশজুড়ে নাশকতার পরিকল্পনা ও মাঠপর্যায়ে সংগঠনের নেতাকর্মীদের প্রশিক্ষণ দেয়া হচ্ছিল।

তবে আগস্ট মাস ঘিরে কোনও ধরনের নিরাপত্তা হুমকি নেই বলে আশ্বস্ত করেছেন ডিএমপি কর্মকর্তা তালেবুর রহমান। তিনি বলেন, “জুলাই অভ্যুত্থান এবং অন্তর্বর্তী সরকারের বর্ষপূর্তিকে কেন্দ্র করে আগস্টে অস্থিরতা ছড়ানোর কোনও শঙ্কা নেই।”

এছাড়া একই সংবাদ সম্মেলনে জানানো হয়, গুলশানের সাবেক সংসদ সদস্য শাম্মী আহমেদের বাসায় চাঁদাবাজির মামলায় বাংলাদেশ গণতান্ত্রিক ছাত্র সংসদের সাবেক যুগ্ম-আহ্বায়ক জানে আলম অপুকে ওয়ারী এলাকা থেকে গ্রেফতার করেছে মহানগর গোয়েন্দা পুলিশ (ডিবি)। তার গ্রেফতারের মধ্য দিয়ে ওই মামলায় অভিযুক্ত ছয়জনকেই আটক করা হয়েছে বলে জানিয়েছে ডিবি।